

LEKSYON 2

**NAGATUON
IKAW SA
PAGLAKAT**



Ang Matun-an Mo Sa Sini Nga Leksyon

**Ibutang ang Imo Kamot sa Kamot
sang Dios**

**Gintilawan bala ni Satanas nga Pu-
kanon Ikaw?**

**Nagaantos Ka bala Tungod kay
Kristo?**

**Ginatublag bala Ikaw sang Pag-
pangduhaduha?**

**Ginahigugma Ikaw sang Imo Amay
Dulaa ang Imo mga Pangduhaduha
karon**

Maghinulsol

**Magtuo sa Ebangelyo: Magtuo kay
Jesu-Kristo**

Ibutang ang Imo Kamot sa Kamot sang Dios

Daw ano ka malipayon ang mga ginikanan kon ang ila bata magtuon na sa paglakat. Subong man, malipayon ang langitnon mo nga Amay kon ikaw nga Iya anak magsugod sa paglakat kaupod Niya sa Kristohanon nga pagkabuhi. Indi ka magkahadlok nga basi matumba ikaw. Ibutang lang ang imo kamot sa kamot sang imo Amay kay magabulig Sia sa imo. Sa tagsa ka adlaw sa imo pagbugtaw, magpangayo ikaw sa Iya sing bulig sa tanan nga butang nga imo pagabuhaton.

Buhata Ini

Butangi sang x ang tupad sang husto nga sabat.

1. Sa ano nga palaanggiran ginapaanggid ang imo kabuhi nga Kristohanon sa sini nga leksyon?

.... a) kaangay sang tawo nga nagalakat lang sa iya kaugalingon.

.... b) kaangay sang bata nga indi makalakat.

.... k) ang paglakat nga nagabutang sang imo kamot sa kamot sang Dios.

Sabat: 1. k) ang paglakat nga nagabutang sang imo kamot sa kamot sang Dios.

Gintilawan bala ni Satanas nga Pukanon Ikaw?

Si Satanas ang yawa, kaaway sang Dios kag sang tagsa ka Kristohanon. Nagatinguha siya nga

masandad ikaw. Mahimo niya nga gamiton ang paghingabot ukon ang pangduhaduha kon bala naluwas ikaw. Si Satanas masunson nga nagapagkigsumpong sa mga Kristohanon. Kag nagatinguha gid Sia nga magpalayo sila sa Dios. Ginatinguhaan niya nga maglibog ang ulo sang bag-o nga mga Kristohanon sa mga pagpangduhaduha kag sa mga kalisdanan. Indi sia gusto nga magtuon ikaw sa paglakat kaupod sa Dios.

Gani indi lang ikaw magakatingala nga kon kaisa nagakasandad ikaw ukon nagakabunggo samtang nagatuon ikaw sa paglakat. Ang bata mahimo nga makabunggo kag masakitan ang iya kaugalingon. Apang indi ini kabangdanan para sa iya sa pag-untat sa pagtinguha sa pagtilaw nga makalakat liwat.

Buhata Ini

2. Sa tion nga Kristohanon na ikaw
 - a) nadula na ang imo mga gumontang
 - b) si Satanas magatinguha nga pukanon ikaw
 - k) indi na gid ikaw magapangduhaduha ukon pagasulayon pa
3. Si Satanas masunson nga nagatinguha nga ang bag-o nga Kristohanon maga
 - a) kalipay sa ila kaluwasan
 - b) pangduhaduha nga may Dios
 - k) pangduhaduha kon bala naluwas sila.

- Sabat: 2. b) si Satanas magatinguha nga pukanon ikaw.
3. k) pangduhaduha kon bala naluwas sila.

Panumdoma nga ang Langitnon mo nga Amay mas makusog pa sang sa panulay kag pagakaptan Niya ang imo kamot.

Kag nagahatag ako sa ila sing kabuhi nga walay katapusan, kag indi gid sila mawala, kay walay isa nga makaagaw sa ila sa kamot sang Amay. Juan 10:28.

Buhata Ini

4. Sauloha ang mga pulong ni Ginu-ong Jesus sa Juan 10:28.

Naga-antos Ka bala Tungod kay Kristo?

Indi lang ikaw matingala ukon maakig kon ang imo panimalay kag ang iban nga abyan nimo magayaguta sa imo tungod kay ginbaton nimo si Kristo nga imo Manluluwas. Mahimo nga ila ikaw hingabuton. Isa ka kadungganang kag kahigayunan ang mag-antos para sa Iya nga nagpakamatay sa krus para sa aton. "Pas-anon naton ang aton krus" kag magsunod sa Iya. Ipakita naton sa iya nga ginapasalamatan naton ang Iya pag-antos sa aton.

Labot pa, ang Ginuo nagsaad sang padya sa mga naga-antos para sa Iya.

Kon sin-ong buot magsunod sa akon, magdumili sia sang iya kaugalingon kag magpas-an sang iya krus adlaw-adlaw kag magsunod sa akon. Lucas 9:23.

Bulahan ang mga ginahingabot bangod sa pagkamatarung, kay ila ang ginharian sang langit. Bulahan kamo kon ang mga tawo magpasipala sa inyo kag maghingabot sa inyo kag maghambal sang tanan nga bagay sang kalautan batok sa inyo sing di-matuod bangod sa akon. Mateo 5:10, 11.

Buhata Ini

5. Kon mag-antos ikaw bangod kay Kristo magbatyag ikaw sing
- a) kasubo kag pagkaluya.
 - b) kaakig kag handa magpakig-away.
 - k) kalipay kay may padya sa langit.

Ginatublag bala Ikaw sang Pagpangduhaduha?

Indi lang ikaw magkabalaka kon nabudlayan ka sa paghimo sing matarung. Kay kon ang tawo matawo liwat, matuod nga anak sia sang Dios apang kinahanglan pa nga magtuon sia sa paglakat. Kon ang bag-o nga Kristohanon makasayop ang panulay nagasutsot sini nga hunahuna sa iya: “Tan-awa ang akon ginhimo. Ayhan indi ako anak sang Dios kay dapat kuntani nga indi ako maggawi sing subong.”

Nagalibog ang ulo sang iban nga mga Kristohanon, kag tungod sini nagaabot ang pagpang-

duhaduha. Makapangduhaduha sila: “Ah, indi ako makapangabuhi sang kabuhing Kristohanon. Mabudlay kaayo para sa akon. Maayo pa magbalik na lang ako sa daan ko nga pagkabuhi kag indi na lang mag-alagad sa Dios. Labot pa, wala man nakon makita ang daku nga kabalhinan sang akon kabuhi subong sang ginahambal sang iban nga Kristohanon. Wala man nakon mabatyagi ang kalipay sang kaluwasan. Siguro indi man ako Kristohanon.”

Nasugata na bala nimo ini nga mga pagpangduhaduha? Dumdoma nga naggikan ina sa imo kaaway nga nagatinguha sa pagpaluya sa imo agud matumba ikaw. Ang iban nga tawo nakabatyag sing labaw nga kalipay sa nahaunang tion nga sila naluwas sang sa iban. Gani indi lang ikaw magpalibog kon ano ang imo ginabatyag, kay sa dalayon nimo nga pagtuon nahanungod sa ginhimo sang Dios nga nangin anak Niya ikaw, nagadugang ang kalipay nga imo maangkon. Samtang nagpasalamat ikaw sa mga pagpakamaayo nga imo nabaton, nagatubo man ang imo kalipay. Dumdoma nga ang imo kaluwasan wala nasandig sa imo balatyagon. Yara ina sa katutom sang Ginuo nga gintugyanan nimo sang imo kabuhi kag kalag.

Kon makasandad ikaw kag matumba, wala ina nagakahulogan nga indi ikaw makatuon sa paglakat, ukon indi na ikaw anak sang Dios. Panga-
yoa ang Iya pagpatawad kag magbangon ikaw kag maglakat liwat.



Nahanungod naman sa kabalhinan sa imo, ang handum nimo sa pagpahamuot sa Dios, kag ang kamatuoran nga ikaw nagakasubo sang imo kapaltahan, nagapakilala lamang sang pagbag-o sang imo kinaiya. Gani indi lang ikaw magkaluya. Dumdoma nga may iban nga kabataan nga nabudlayan sa paglakat kay sa iban nga kabataan.

Buhata Ini

6. Kon magbatyag ikaw sing kaluya kag kasubo, kinahanglan panumdomon nimo nga

.... a) ang matuod nga Kristohanon permi lang malipayon.

.... b) ang kalipay nga mabatyagan sa tion sang kaluwasan nagakaanggid sa tanan nga Kristohanon.

.... k) sa dalayon nimo nga pagpasalamat sa Dios sang Iya pagpakamaayo nagadugang ang kalipay nga imo mabatyagan.

7. Ang imo kaluwasan nasandig sa

.... a) katutom sang Dios

.... b) sa imo balatyagon

.... k) sa imo kaayo

Sabat: 6. k) sa dalayon nimo nga pagpasalamat sa Dios sang Iya pagpakamaayo nagadugang ang kalipay nga imo mabatyagan. 7. a) katutom sang Dios

Ginahigugma Ikaw sang Imo Amay

Sa imo pagbanta akigan ayhan sang isa ka mahigugmaon nga ginikanan ang ila anak kon matumba? Ukon pabayaan lamang bisan nasakit na ang ila anak? Indi mahimo ina! Hakwaton nila ang bata kag paumpawan, pagkatapos pabakuron ang iya balatyagon agud magapadayon sia sa pagtuon tubtob makahibalo sia sa paglakat sing maayo. Sa banta mo pabay-an ayhan sang Dios ang mga anak Niya nga nagsugod pa lamang sa paglakat? Indi mahimo ina! Magpangamuyo sa Iya kag sugiri Sia. "Salamat Amay sa imo pag-uyat sang akon kamot kag sa pagtudlo sa akon sa paglakat nga Kristohanon. Maluya ako apang akon nahibaloan nga buligan nimo ako kon ano ang dapat nakon buhaton."

Dapat mo mahibaloan nga ang Dios nagatuytoy sa imo sa Kristohanon nga kabuhi. Ginahimo Niya ini paagi sa Iya Balaan nga Espiritu kag sa Iya Pulong, ang Biblia. Basaha ang Biblia kag magpangamuyo adlaw-adlaw. Magabulig ini sa pagpala sang imo mga pangduhaduha. Kag makalakat ikaw nga indi makasandad.

Buhata Ini

8. Kon makasandad ikaw kag makahimo sang butang nga indi nimo dapat himuon, makasalig ikaw nga ang imo Langitnon nga Amay
.... a) magapangakig kag ihaboy ikaw sa

gowa sang balay.

.... b) magapatawad kag magabulig sa imo nga magmangin maayo pa

.... k) magapabaya sa imo.

9. Ang Balaan nga Espiritu magatuytoy sa imo kag magatudlo sang takus nimo nga pagabuhaton samtang

.... a) nagabasa ikaw sang Biblia kag nagapangamuyo adlaw-adlaw.

.... b) nagapangita ikaw sang imo kapalaran sa mga manughimalad.

.... k) nagapamati ikaw sa mga laygay sang imo mga abyan.

Sabat: 8. b) magapatawad kag magabulig sa imo nga magmangin maayo pa. 9. a) nagabasa ikaw sang Biblia kag nagapangamuyo adlaw-adlaw.

Dulaa ang Imo mga Pangduhaduha Karon

Ayhan nagapainuino ikaw karon kon bala nahimo na nimo ang tanan nga ginapaabot sang Dios nga imo himuon agud maluwas. Naghambal si Kristo sing maathag kon ano ang pagabuhaton sang tawo agud maluwas. Gani tan-awon naton kon nahimo nimo ang imo bahin. Kon may bagay nga wala nimo matuman, mahimo nimo ina karon kag mapat-od ang imo kaluwasan.

Ang Dios nagapangayo sa imo sang duha ka butang agud maluwas ikaw: Una, maghinulsol ikaw sang imo mga sala, kag ikaduha magtuo sa Maayong Balita.

Buhata Ini

10. Ang ginapabuhat sang Dios sa imo agud maluwas ka amo ang
- a) paghinulsol sang imo mga sala kag pagtuo sa Maayong Balita
 - b) paghimo sang penitensya kag pagpasakop sa iglesia.
 - k) paghimo sing maayo sa pagtabon sang imo sala.

Sabat: 10. a) paghinulsol sang imo mga sala kag pagtuo sa Maayong Balita.

Maghinulsol

Ang paghinulsol nagakahulogan nga magkasubo ikaw sa imo mga sala kag isikway ini sila.

Hinulsol kamo, kag magtuo sa Maayong Balita. Marcos 1:15.

Nagakasubo bala ikaw kay nagmalinapason ikaw sa Dios? Nagpamat-od bala ikaw sa pagsikway sang imo mga sala sa imo kabuhi ukon may mga sala pa bala ikaw nga indi nimo buot talikdan. Handa bala ikaw sa pagbiya sang imo kaugalingon nga dalanon kag sugod karon magbuhat sang nagapahamuot lamang sa Dios?

Buhata Ini

11. Sauloha ang Pulong ni Ginuong Jesus sa Marcos 1:15.
12. Ang paghinulsol nagakahulogan nga
 - a) magkasubo ikaw sa imo mga sala kag isikway sila.
 - b) magtuad sang imo mga sala sa pari.
 - k) magpangayo sing kapatawaran kag padayunon ang pagpakasala.

Sabat: 12. a) magkasubo ikaw sang imo mga sala kag isikway sila.

May nakahimo bala sa imo sing malain kag indi mo mapatawad? Ang kaakig kag paghupot sing aligutgot amo ang mabudlay nga sala nga nagapahilayo sang madamo nga mga katawohan sa langit. Ang Dios gugma kag indi Sia makapuyo sa tagipusoon nga napun-an sang kaakig kag dumot. Kon may dumot ikaw sa isa ka tawo patawara siya karon. Pangayoa ang bulig sang Dios sa paghigugma sa mga tawo nga nagahimo sa imo sang sala.

Apang kon indi ninyo pagpatawaron ang mga tawo sang ila mga paglapas, indi man ang inyo Amay magpatawad sang inyo mga paglapas. Mateo 6:15.

Kon nagapangduhaduha pa ikaw kon bala tinagipusoon ang imo paghinulsol, dulaa ini sa gilayon paagi sa pagsikway sang imo mga sala kag kaugalingon nga banas agud may gahum ang Dios sa imo kabuhi sugod karon.

Buhata Ini

13. Kon may nakasayop sa imo, kinahanglan
- a) taguon mo ang imo kakig sa nakasayop sa imo.
 - b) patawaron mo sia dayon.
 - k) isugid mo sa iban kon daw ano sia kalain.

Sabat: 13. b) patawaron mo sia dayon.

Magtuo sa Ebanghelyo: Magtuo kay Jesu-Kristo

Ang tinaga nga *ebanghelyo* nagakahulogan sang *Maayong Balita*. Nagakahulogan ini sang Maayong Balita nahanungod sa kaluwasan kay Jesu-Kristo. Ang masunod nga mga pagtudlo nahanungod sa Maayong Balita makita sa Biblia. Isulat ang “huo” sa katapusan sang dinalan nga imo ginatoohan.

▲ Daku ang paghigugma sa Dios sa imo sa bagay nga ginpadala Niya ang Iya Anak nga si Ginuonng Jesus sa pagbaton sing silot tungod sa imo mga sala.

▲ Napatay si Ginuong Jesus para sa imo mga sala. Hilwayon Niya ikaw kon batunon mo Sia nga Ginuo kag Manluluwas.

▲ Nambahaw si Ginuong Jesus gikan sa minatay kag nagkayab pa langit. Nagapangamuyo Sia kag nagahanda sang puloy-an para sa imo.


▲ Sang pagbaton nimo kay Ginuong Jesus nga Manluluwas, nangin anak ikaw sang Dios kag may bag-o ikaw nga kabuhi sa Iya.

▲ Magabalik si Ginuong Jesus sa pagkuha sang mga nagatuo sa Iya kag dalhon Niya sila sa walay katubtoban nga puloy-an didto sa langit.

Ginatuohan mo bala ini tanan nahanungod kay Ginuong Jesus,..... Ginbaton bala nimo Sia nga personal nga Manluluwas? Busa magsalig sa Iya. Tuohi ang Iya mga saad.

Magtuo ikaw kay Ginuong Jesus kag maluwat ka. Mga Binuhatan 16:31.

Ang Dios nagahatag sa aton sing kabuhi nga walay katapusan, kag ining kabuhi yara sa Iya Anak! Ang nakabaton sa Anak may kabuhi, ang wala nakabaton sa Anak walay kabuhi. 1 Juan 5:11, 12.



Buhata Ini

14. Ang ebanghelyo nagakahulogan sang
a... a) Maayong Balita sang kaluwasan kay Jesu-Kristo
..... b) pagwali
..... k) mga tulomanon sa simbahan.
15. Sauloha ang Mga Binuhatan
16:31 kag 1 Juan 5:11, 12.

Sabat: 14. a) Maayong Balita sang kaluwasan kay Jesu-Kristo

Ang magtuo kay Ginuong Jesus nagakahulogan nga magsalig ikaw sa Iya. Nakahangop kag nagahigugma Sia sa imo. Nagapangamuyo Sia sa Amay para sa imo. Si Ginuong Jesus ang ginpili sang Dios sa paghimo sini.

Kay may isa ka Dios, kag may isa ka manugpatunga sa Dios kag sa mga tawo, ang tawo nga si Kristo Jesus. 1 Timoteo 2:5.

Kag walay kaluwasan sa bisan kay sin-o nga iban, kag walay iban nga ngalan sa idalom sang langit nga ginhatag sa mga tawo nga paagi sa Iya kinahanglan kita maluwas. Mga Binuhatan 4:12.

Nagsiling si Ginuong Jesus, "Ako amo ang Dalan." Wala na sing iban nga alagyan pakadto sa Dios. Indi ikaw makalakat sa duha ka dalan sa isa ka tion. Kinahanglan isikway mo ang bisan ano nga dalan nga *daw sa* makatuytoy sa imo padulong sa Dios agud masunod nimo si Ginuong Jesus, ang matuod nga dalan. Kinahanglan ibug-os mo ang imo pagtuo sa Iya.

Kon nakahinulsol na ikaw kag nagatuo sa mga saad sang Dios kag nagsalig kay Kristo nga imo Manluluwas, naluwas na ikaw.

Buhata Ini

16. Ang Biblia nagatudlo sa aton nga
 a) si Ginuong Jesus amo
 lamang ang dalan padu-
 long sa Dios.
 b) madamo ang alagyan pa-
 kadto sa Dios.

Sabat: 16. a) si Ginuong Jesus amo
 lamang ang dalan padulong sa Dios.

Gusto mo bala mapat-od nga si Ginuong Jesus amo ang imo Manluluwas? Gusto mo bala nga ihalad liwat ang imo kabuhi sa Dios, kag segu-rohon nga nagalakat ikaw kaupod Niya? Sugiri Sia paagi sa mga pulong sining pangamuyo:

Pangamuyo

Salamat O Dios, sang Imo gugma sa akon kag sa pagpadala mo sang Imo Anak nga si Ginuong Jesus sa pagpakamatay tal-os sa akon. Ginabaton ko Sia nga akon Manluluwas kag Agalon. Salamat sang imo pagpatawad sang akon mga sala kag pagbaton mo sa akon nga Imo anak. Buligi ako nga magmangin maayo kag magmangin matinumanon kag sa pagpahamuot sa Imo sa tanan nga butang. Ginahatag nakon ang akon kaugalingon sa Imo. Buligi ako sa paglakat upod sa Imo sa bug-os ko nga kabuhi. Kabay pa.

TION PARA SA PALASINAWAN

Karon, imo na masulat ang mga sabat sa imo palasinawan.

PAGPAKILALA sang LEKSYON 3

Pangibulahan sa pagtapos mo sa pagtuon sang leksyon 2. Karon, ang ICI nagatanyag sa imo sang Leksyon 3 nga ginatigulohan, "ANG IMO AMAY NAGAPAKIGHAMBAL SA IMO."

Subong sang isa ka bata nga nakatuon sa pagkilala sang tingog sang iya amay, ikaw man makatuon sa pagpamati kag sa paghigugma sa tingog sang imo Langitnon nga Amay. Ang Biblia nagasiling nga may madamo nga mga sari sang tingog sa kalibutan. Kon indi nimo makilala ang tingog sang Dios, mahimo ka madayaan ni Satanas. Apang indi kinahanglan nga madayaan ka! Kon buot ikaw makahibalo sang mas maayo pa kon paano "ANG IMO AMAY NAGAPAKIGHAMBAL SA IMO" magsulat kag magpangayo sang Leksyon 3 sa sining "ANG BAG-O MO NGA KABUHI" nga mga tulong. Mahibalo-an nimo kon bala nagpamati ikaw sa Iya ukon wala!

Indi magpadugay, magpadala sang diotay nga bulig kag magpangayo sang Leksyon 3 nga ginatig-ulohan, "ANG IMO AMAY NAGAPAKIGHAMBAL SA IMO" kag sang Leksyon 4, nga ginatig-ulohan "GUSTO MO BALA NGA MAGTUBO?" karon! Ipadala ang imo pangabay sa:

**INTERNATIONAL CORRESPONDENCE
INSTITUTE**

PHILIPPINE NATIONAL OFFICE

P. O. BOX 1084 - MANILA